

JESUSI JAYOTEAN



Kanarioaren boz gozoa baño
Baneuka leunago nik berba-otsa,
Edegiko neukez ezpanok bertatik,
Agertzeko Jauna, zuri gaur poza.

Fedeagaz ziur sortaldean dakust
Egun barri baten goisgorrichoa,
Gabagaz igesi badoa illuna,
Eguzki orren da bildur lañoa.

Jaungoikoak oraiñ firmau dau bakea
Jayotera doian Izar barriaz,
Lurrau alegere laster jarriko da,
Beragaz dakarren argitasunaz.

Mendi ta zelayak udeak leortu
Arren, oraiñ urak dabez ezkotu,
Mesias dalako zeruko euria,
Ak biotzok deuskuz eingo gozotu.

Jaungoiko gizondu danari soñuak
Urrezko lirakaz jo Aingeruak,
Eregi gloria gizon eta andrak,
Aberatsak eta pobre gaisuak.

Ichasoak perlak, iturriak urak,
Egunak argia, usaiña lorak,
Choriak *chioa*, barrea arpegiak,
Ta aiñseak Jesusi emon laztanak.

FELIPE ARRESE TA BEITIA

